

## 1 TESALONAIKA

<sup>1</sup> Iga Pol na Sailas na Timoti na iga qalub anjam endi nenngrenyosim ningi Tesalonaika qureq di loueqnub qaji nunngoq qarinyonum. Ningi Tamo Koba Yesus Kristus aqa Abu Qotei wo nanngi aiyel beternjrejunub.

Qotei a ningi qa are boleiyimqa ningi lawo na soqniy.

*Tesalonaika Kristen nanngi Yesus qa nanngo areqalo singi-lateb*

<sup>2</sup> Iga gaigai ningi kalil qa pailyoqnsim Qotei binjiyeqnum. <sup>3</sup> Ningi Yesus qa nunngo areqalo singilateqnub deqa ningi kumbra bole bole yeqnub. Osib ningi qalaqalaiyo kumbra dauryoqnsib wau bole ojeqnub. Mondorj gago Tamo Koba Yesus Kristus a olo bqas. Ningi a qa tariñoqnsib singila na tigelejunub. Iga nunngo kumbra deqa are qaloqnsim gago Abu Qotei binjiyeqnum. <sup>4</sup> O ijo was kalil, Qotei a ningi aqa segi qa marsiq giltngkej deqa a na ningi tulanj qalaqalaingeqnu. Di iga qalieonum.

<sup>5</sup> Iga nami Yesus aqa anjam bole nunngoq osi bem. Iga laña anjam maro na osi bosai. Iga singila ti Mondor Bole ti areqalo bole ti dena osi bem. Ningi qalie, iga nunngo ambleq di sosim kumbra boledamu yoqnsim ningi aqaryaingoqnem.

<sup>6</sup> Ningi Qotei aqa anjam ojesoqneb deqa gulbe gargekoba nunngoq di brantoqnej. Bati deqa ningi gago kumbra ti Tamo Koba aqa kumbra ti dauryoqneb. Ningi uratosaiqneb. Mondor Bole na nunngo areqalo tigeltetnggoqnej deqa ningi tulanj areboleboleinggoqnej. <sup>7-8</sup> Ningi Tamo Koba aqa anjam palonteqnab anjam di giloqnsiq Masedonia sawa ti Akaia sawa ti dia brantoqnej. Deqa sawa dia tamo unngasari kalil Yesus qa nanngo areqalo

siŋgilateqñub qaji naŋgi nuŋgo kumbra qa quoqnsib dauryeqñub. Sawa dia segi sai. Sawa sawa kalilq di dego niŋgi Qotei qa nuŋgo areqalo siŋgilateb deqa saoqnsib laqñab tamo uŋgasari naŋgi quekriteqñub. Deqa uŋgum, iga aitentosis nuŋgo kumbra deqa olo mare mare laqasai. <sup>9</sup>Iga nami nuŋgo ambleq di sonamqa bati deqa niŋgi gago anjam dauryoqñeb. Nuŋgo kumbra deqa sawa sawa kalilq di tamo uŋgasari naŋgi saoqnsib laqñub. Niŋgi are bulyosib gisaŋ qotei naŋgi torei uratnjrsib Qotei bole agi ŋambile gaigai unu qaji a areiyosib waueteqñub. <sup>10</sup>Osib niŋgi Qotei aqa ŋiri a laŋ qureq na bqajqa deqa tariŋoqnsib unub. Nuŋgo kumbra deqa dego sawa sawa kalilq di naŋgi saoqnsib laqñub. Qotei aqa ŋiri di agi Yesus. A moinaqa Qotei na olo subq na tigeltej. A na iga padalo sawaq na elenej deqa mondoŋ Qotei aqa minjiŋ oqwa bati boqñimqa iga aqa minjiŋ di turqasai. Iga so bole gaigai sqom.

## 2

### *Pol a Tesalonaika Kristen naŋgo ambleq di wau bole yoqnej*

<sup>1</sup>O ijo was niŋgi segi qalie, iga nami nuŋgoq bosim nuŋgo ambleq di wauoqñem gago wau di laŋa uloŋosai. <sup>2</sup>Niŋgi qalie, iga nuŋgoq bosaisosimqa iga Filipai qureq di Qotei aqa wau ojeqñam jeu tamo naŋgi na iga jaqatiŋ egoqnsib ugeugeigoqñeb. Bunuqna iga nuŋgo qureq bonamqa dia dego jeu tamo naŋgi na iga ugeugeigoqñeb. Gago Qotei na gago are siŋgilatetgej deqa iga jeu tamo naŋgi qa ulaosai. Iga siŋgila na tigeloloqnsim Qotei aqa anjam bole niŋgi merngoqñem. <sup>3</sup>Bati deqa iga niŋgi endegsi merngoqñem, “Niŋgi Yesus qa nuŋgo areqalo siŋgilatiy.” Iga anjam uge bei niŋgi merngosai oqñem. Iga nuŋgo ambleq di sosim kumbra jiga ti gisaŋ kumbra ti yosai oqñem. <sup>4</sup>Qotei a segi gago kumbra tenemtoqnsiq

une bei unosaiognej deqa a na iga wau egsiqa mergej, “Ningi ijo anjam bole mare mare laqniy.” O ijo was, mandam tamo nanği gago wau qa arearetnjroqnqajqa iga deqa are qalosaiognem. Iga endegsi are qaloqnm, “Qotei a segi gago are miligi peleiyqnsim gago wau qa arearetoqnqas.” <sup>5</sup> Ningi qalie, iga walawala anjam bei ningi mernğosaioqnm. Osim nunğo inği inği qa maulgonaq laņa gisaņ na anjam palontosaiognem. Qotei a segi gago kumbra qa qalie. <sup>6</sup> Iga wauoqnm di ningi na kiyo tamo qudei na kiyo gago ñam soqtetgwajqa deqa wauoqnm e? Sai. Iga deqa wauosaiognem. <sup>7</sup> Bole, iga Kristus aqa wau tamo bole unum deqa iga ningi endegsi mernğwa kere, “Ningi silali inği inği qa aqaryaigoqniy.” Ariya iga degyosai. Iga nunğo ambleq di anğro kiñilala bul lawo na soqnm. Ai nanği na nanğo anğro mom nanği munğum anainjreqnub dego kere iga nunğo ai bul sosim ningi gereinğoqnm. <sup>8</sup> Osim iga ningi tulaņ qalaqalaingognem. Deqa iga nunğo silali inği inği yaingwajqa are qalosaiognem. Iga Qotei aqa anjam bole ningi mernğwajqa deqa are qaloqnm. Di segi sai. Iga gago segi ģambile dego uratosim ningi aqaryaingwajqa are qaloqnm. Di kiyaaq? Ningi gago Kristen was bole unub deqa.

<sup>9</sup> O was ningi qalie, iga ningi koba na sosimqa Qotei aqa anjam bole mernğoqnm bati deqa iga waukobaoqnm. Iga ningi gulbe enğwa uratosim deqa gago segi baņ na qanam ti qolo ti tulaņ siņgila na wauoqnm. Osim dena gago segi inği inği awaiyoqnsim uyoqnm. Ningi iga silali qa aqaryaigwajqa deqa mernğosaioqnm.

<sup>10</sup> Ningi Yesus qa nunğo areqalo siņgilateqnu b qaji iga na kumbra bole bole osornğoqnm. Iga kumbra uge bei osornğosaioqnm. Iga Qotei aqa ģamgalaq di kumbra bole tiņtiņ nunğo ambleq di yoqnm. Di ningi qalie. Qotei a dego qalie. <sup>11</sup> Abu nanği na nanğo anğro

nan̄gi tingitnjroqnsib dalnjreqnub dego kere iga ningi tingitn̄goqnsim daln̄goqnem. <sup>12</sup> Iga ningi degn̄goqnem. Di kiyaaq? N̄ngi kumbra Qotei a tulañ areareteqnu qaji di yoqnsib walweloqn̄qajqa deqa. Qotei agi a na ningi endegsi metn̄gej, “N̄ngi ijoq babqa e nun̄go Mandor Koba sosiy n̄ngi taqatn̄gitqa n̄ngi lañ qureq di so bole gaigai sqab.”

### *Tesalonaika Kristen nan̄gi gulbe qoboioqneb*

<sup>13</sup> Iga Qotei aqa anjam ningi mern̄geqnam ningi quoqn̄sib endegsib are qalosaioqneb, “Anjam di mandam tamo nan̄go anjam.” Sai. N̄ngi are qaloqneb, “Bole, anjam di Qotei aqa anjam tintiñ.” Deqa bini Qotei aqa anjam di nun̄go are miligiq di singila na waueqnu. Di kiyaaq? N̄ngi Yesus qa nun̄go areqalo singilateb deqa. Utru deqa iga gaigai Qotei bin̄iyeqnum. <sup>14</sup> O ijo was, tamo un̄gasari Judia sawaq di Kristus Yesus aqa Abu Qotei wo qa loueqnub qaji nan̄go kumbra agi ningi dauryeqnub. Tamo un̄gasari nan̄gi di Juda nan̄gi na gulbe koba enjroqneb dego kere nun̄go segi leñ qujai nan̄gi na ningi gulbe koba en̄geqneb. <sup>15</sup> Juda nan̄gi na Tamo Koba Yesus qalsib moiyoqneb. Nan̄gi nami Qotei aqa medabu o qaji tamo nan̄gi dego ñumoqnsib moiyoqneb. Osib iga dego wigoqneb iga nun̄go qure uratosim jaraiyem. Juda nan̄gi di kumbra Qotei a tulañ areareteqnu qaji di gotran̄yoqnsib tamo un̄gasari kalil nan̄gi jeutnjreqnub. <sup>16</sup> Osib iga na sawa bei bei qaji nan̄gi Qotei aqa anjam minjrqa yeqnam gam getentetgeqneb. Qotei na sawa bei bei qaji nan̄gi elen̄aim deqa Juda nan̄gi na gam getentetgeqneb. Deqa nan̄gi bati gaigai nan̄go segi une tumbol ateqnub. Nan̄gi kumbra degyeqneb deqa Qotei aqa minjin̄ bosiq nan̄goq di unu.

*Pol a Tesalonaika Kristen nanngi olo unjrqaqqa are koba qaleqnu*

<sup>17</sup> O ijo was, Juda nanngi na iga wigebe deqa iga ningi uratngosim bati truquyala sawa beiq di soqnem. Deqa iga nunngo ulatamu unosaieqnum. Ningi gago are miligiq di unub deqa iga ningi ti sobulejunum. Deqa iga nunngoq olo bosim nungwajqa gam n̄ameqnum. Iga ningi olo nungwajqa are koba qaleqnum. <sup>18</sup> Od, iga nunngoq olo bqajqa are unu. E Pol e segi bati gargekoba nunngoq olo bqajqa yeqnam Satan na iga gam getentetgoqnej. <sup>19</sup> Mondorj gago Tamo Koba Yesus a larj qureq na bamqa bati deqa iga ningi qa are singilatosim Yesus aqa n̄amgalaq di tularj areboleboleigwas. Yim Yesus na mergwas, “Ningi ijo wau tamo bole.” O ijo was, bati deqa iga ningi qa tularj areboleboleigwas. <sup>20</sup> Od, bini dego iga ningi qa tularj areboleboleigqnu. Ningi na gago are tularj boletetgeqnu.

### 3

*Pol a Timoti qarinyonaq Tesalonaika Kristen nanngoq gilej*

<sup>1</sup> Iga ningi qa are kobaigoqnej. Deqa iga are qalem, “Un̄gum, iga olo tarinqa keresai. Aqo Sailas wo Atens qureq endi sqom.” <sup>2</sup> Iga degsi are qalsimqa Timoti qarinyonam nunngoq gilej. Timoti a gago Kristen was bole. A Qotei aqa wau tamo. A Kristus aqa anjam bole maro qaji tamo. A ningi aqaryaingosim nunngo areqalo Yesus qa singilateqnu qaji di olo singilateqnu deqa osim qarinyonam nunngoq gilej. <sup>3</sup> Gulbe ti jaqatin ti ningi eqnub qaji dena nunngo areqalo ugetetngaim deqa marsim Timoti qarinyonam nunngoq gilej. Ningi qalie, Qotei a nami ningi ti iga ti gulbe oqajqa marsiq giltgej. <sup>4</sup> Agi iga ningi koba na sosimqa endegsi mern̄goqnem, “Gulbe gargekoba gagoq boqn̄as.” Mern̄geqnam gulbe agi gagoq di brantoqnej. Di ningi qalie. <sup>5</sup> Utru deqa e tarinqa keresai. Ningi

nunqo areqalo Yesus qa bole singilateqñub kiyo sai kiyo di e qalieqajqa deqa Timoti qarinyonam nunqoq gilej. E endegsi are qalem, walawalaiyo tamo Satan na ningi uneq wainqonaqa ningi gago wau laña ulontosib nunqo areqalo Yesus qa singilato qaji di urateb kiyo? Degsi are qalsim are kobaiboqnej.

*Timoti a olo bosiqqa Pol minjej, “Tesalonaika Kristen nango so bolequja”*

<sup>6</sup> Ariya Timoti a nunqoq gilsiqqa olo uratñgsiqqa aqo Sailas wo gagoq di brantosiqqa anjam bolequja endegsi mergej, “Tesalonaika Kristen nanqi Yesus qa nanqo areqalo singilatoqñsib segi segi qa qalaqalaiyo kumbra yeqñub. Osib gaigai ningi qa are boleinjreqñu. Ningi nanqi unjrqaqqa are koba unu dego kere nanqi kamba ningi nunqwjajqa are koba unu.” <sup>7</sup> O ijo was, ningi Yesus qa degsib nunqo areqalo singilateqñub anjam di Timoti a bosiq aqo Sailas wo saigonaqa anjam dena gago gulbe kalil qa olo are singilatetgej. <sup>8</sup> Deqa iga qalieonum, ningi singila na Tamo Koba aqa ñam ojejunub. Iga di qalieosim deqa bini iga so bole unum. <sup>9</sup> Iga ningi qa are qaloqñsim deqa iga gago Qotei aqa ñamgalaq di tulañ areboleboleiqñu. Gago arebolebole di tulañ kobaquja. Qotei na arebolebole di iga egej deqa iga a binjiyeqñum. <sup>10</sup> Iga qanam ti qolo ti endegsim Qotei pailyeqñum, “O Abu, ni na odgimqa iga Tesalonaika Kristen nangoq gilsim unjrqom. Unjrñsim nango areqalo Yesus qa singilateqñub qaji di truqinjrñimqa iga na olo singilatetñjrñom.” Iga degsim Qotei pailyeqñum.

*Pol a olo Tesalonaika Kristen nangoq gilqajqa are qaleqñu*

<sup>11</sup> Gago are koba endegsi unu. Gago Abu Qotei wo gago Tamo Koba Yesus wo nanqi aiyel na gam waqtetgibqa iga nunqoq olo gilqom. <sup>12</sup> Gago areqalo bei dego agiende.

Tamo Koba a na ningi aqaryainjimqa qalaqalaiyo kumbra nungoq di tulan kobaeme. Amqa ningi segi segi qa qalaqalaiyo kumbra yoqnsibqa tamo ungasari kalil nanngi dego tulan qalaqalainjroqniy. Agi iga na ningi tulan qalaqalaingeqnum dego kere. <sup>13</sup> Kumbra dena Qotei a nungo are miligi singilatetngimqa ningi aqa segi kumbra bole dauryoqnsib tamo ungasari tulan bolequja brantosib gago Abu Qotei aqa n̄amgalaq di une saiqoji soqniy. Soqnib mondoŋ gago Tamo Koba Yesus na Qotei aqa segi tamo ungasari kalil nanngi laŋ qureq dena joqsim bqas. Bole.

## 4

### *Ningi sambala kumbra kalil torei uratiy*

<sup>1</sup> O ijo was, kumbra bole kalil Qotei a tulan areareteqnu qaji di iga na nami ningi osorŋgoqnem. Kumbra di agi ningi dauryeqnub. Ariya bini iga nungo are miligi singilatetngosim Tamo Koba Yesus aqa n̄am na endegsi mern̄gwom, “Ningi kumbra bole di olo torei singilatosib yoqniy.”

<sup>2</sup> Anjam kalil iga nami Tamo Koba Yesus aqa n̄am na ningi mern̄goqnem qaji di ningi segi qalie. <sup>3</sup> Anjam agiende. Qotei aqa areqalo agi ubtosiy marqai. Ningi aqa segi kumbra boleq di sosib sambala kumbra kalil torei uratiy. <sup>4</sup> Osib ningi nungo segi so geregere taqatiy. Ningi degyqab di ningi Qotei aqa segi kumbra boleq di sosib n̄am bole oqab. <sup>5</sup> Yimqa nungo areqalo uge uge na ningi titngosim sambala kumbraq di breiŋwasai. Ningi qalie, tamo ungasari Qotei qaliesai qaji nanngi sambala kumbra dauryoqnsib unub. <sup>6</sup> Ariya ningi kumbra di uratiy. Ningi na nungo Kristen was nanngi kumbra uge bei osornjraib. Osib nanngi gisaŋnjrsib nanngo n̄auŋ ugetnjraib. Tamo Koba a na tamo ungasari kumbra uge deqaji yeqnub

qaji nanngi awai uge enjrqas. Iga nami ningi singila na degsi merngoqnem. <sup>7</sup> Qotei na iga kumbra jigat yqajqa metgosai. Iga aqa segi kumbra boleq di sqajqa deqa metgej. <sup>8</sup> Deqa tamo bei a gago anjam endi gotranyyas di a kumbra tulan ugedamu yqo. A tamo nanngo anjam gotranyyosai. A Qotei aqa anjam gotranyyo. Qotei agi a na aqa Mondor Bole ningi engeqnu.

*Ninggi qalaqalaiyo kumbra torei singilatosib yoqniy*

<sup>9</sup> Ningi nunngo Kristen was nanngi qalaqalainjreqnub deqa e olo anjam bei totoryosiy nengrenyqasai. Qalaqalaiyo kumbra di Qotei na osorngekritej. <sup>10</sup> Agi ningi na Masedonia Kristen kalil nanngi tulan qalaqalainjreqnub. Ariya ijo was, iga nunngo are singilatetngimqa ningi qalaqalaiyo kumbra di olo torei singilatosib yoqniy. <sup>11</sup> Osib lawo na sosib nunngo segi ingi ingi taqatosib nunngo segi ban na wauoqniy. Anjam di iga nami ningi merngoqnem. <sup>12</sup> Ningi degsib wauoqniqbqa ningi ingi bei qa truqingwasai. Deqa tamo ungasari Yesus qaliesai qaji nanngi nunngo kumbra di unsib tulan areboleboleinjrqas.

*Yesus a olo bosim tamo ungasari moreno qaji ti nambile unub qaji ti nanngi koba na sqab*

<sup>13</sup> Ariya ijo was, tamo ungasari nami moreneb qaji nanngi mondor kumbra kiye turqab di ningi qalieqajqa deqa merngwom. Yim ningi nanngi qa are gulbeingwasai. Tamo ungasari Qotei qaliesai qaji nanngi subq na tigelo bati qa tarijosaieqnub. Deqa nanngo was bei a moiqas di nanngi tulan are gulbeinjrqas. Ariya ningi degsib are gulbeingwasai. <sup>14</sup> Yesus a moisiqa olo subq na tigelej anjam di ningi iga ti gago areqaloq di singilatejunum. Deqa iga qalieonum, mondor Qotei a tamo ungasari kalil Yesus ombla sosib moreneb qaji nanngi subq na tigeltjrimqa



nanġi Yesus beteryosib koba na laŋ qureq na mandamq aiqab.

<sup>15</sup> Iga Tamo Koba aqa anjam ninġi endegsi mernġwom. Mondoŋ Tamo Koba a mandamq aiyoqnimqa iga nambile unum qaji iga na tamo unġasari nami moreneb qaji nanġi buŋnjrsim namo oqsim Yesus itqasai. <sup>16</sup> Qotei a anjam sinġila na marimqa laŋ anġro matu a lelejoqnimqa Qotei a gul anjamqas. Yimqa Tamo Koba Kristus a laŋ qure uratosim mandamq aiyoqnimqa tamo unġasari nami Kristus qa nanġo areqalo sinġilatosib moreneb qaji nanġi namo subq na tigelqab. <sup>17</sup> Tigelabqa bati deqa iga nambile unum qaji iga ti nanġi ti turosime koba na laŋbiq na oqsim Tamo Koba a itqom. Osim a ti gaigai sqom. <sup>18</sup> Deqa ninġi anjam di Qotei aqa tamo unġasari nanġi minjroqnsibqa dena nanġo are sinġilatetnjroqniy.

## 5

### *Yesus a bqajqa bati tamo bei a qaliesai*

<sup>1-2</sup> O ijo was, Tamo Koba Yesus a bati gembu bqas di tamo bei a qaliesai. A bqajqa bati di bajin tamo bul brantqas. Bajin tamo nanġi qolo beqnub dego kere Yesus bqajqa bati di lumu brantosim tamo unġasari nanġi pruatnjrqas. Ninġi di qalie deqa iga olo anjam bei totoryosim nenġrenjyasai. <sup>3</sup> Yesus a bosaisoqnimqa tamo unġasari gargekoba nanġi endegsib maroqnaqab, “Iga so bole unum. Iga inġi bei qa ulaqasai.” Degsib maroqnaqab gulbe kobaquja nanġoq di brantoqujatqas. Uŋa anġrotqa osiq jaqatin eqnu dego kere. Gulbe di nanġi britosib jaraiqa keresai. <sup>4</sup> Ariya ijo was, ninġi ambruq di sosai deqa Yesus bqajqa bati di bajin tamo bul bqas dena ninġi pruatnġwasai. <sup>5</sup> Ninġi kalil puloŋ aqa anġro. Ninġi suwaŋ aqa anġro. Iga qolo qaji tamo sai. Iga ambru qaji tamo sai. <sup>6</sup> Deqa iga njereno ani tamo nanġi bul sqasai. Iga namb

atoqnsim areqalo bole ti sqom. <sup>7</sup> Iga qalie, tamo nanği ħereħeqnub qaji nanği qolo ħereħeqnub. Tamo nanği ya uge uyoqnsib nanarieqnub qaji nanği qolo ya uyeqnub. <sup>8</sup> Ariya iga suwaħ qaji tamo unum deqa iga areqalo bole ti sosim Qotei qa gago areqalo siŋgilatoqnsim qalaqalaiyo kumbra yoqnqom. Gago kumbra di iga qoto qa gara jugo bul jigsim tigelesqom. Osim Qotei na iga padalo sawaq na elenqajqa deqa tariŋoqnqom. Gago kumbra di iga qoto qa gate tatal bul atsim tigelesosim ħam atoqnqom. <sup>9</sup> Qotei na iga aqa minjij turqajqa giltgosai. Gago Tamo Koba Yesus Kristus na iga elenqajqa deqa giltgej. <sup>10</sup> Yesus a iga qa moiyej deqa iga mandamq endi sqom kiyo iga moiqom kiyo di uŋgum. Iga Yesus a koba na ħambile gaigai sqom. <sup>11</sup> Deqa niŋgi segi segi na Qotei aqa tamo uŋgasari nanği anjam bole minjroqnsib dena nanği siŋgilatnjqoniy. Agi bini niŋgi degeyqnub.

### *Niŋgi kumbra bole bole yoqniy*

<sup>12</sup> Ariya ijo was, iga na niŋgi endegsi merħgwom. Niŋgi nuŋgo Kristen gate nanjo sorgomq di soqniy. Tamo Koba a na nanği gate ateleħej deqa nanği niŋgi aqaryaingwajqa waueqnub. Wauoqnsib Qotei aqa anjam niŋgi merħgoqnsib nuŋgo kumbra tingitetħeqnub. <sup>13</sup> Nanği wau di yeqnub deqa niŋgi nanği qa are boleingoqnim nanği qalaqalainjqoniy. Osib niŋgi nuŋgo Kristen was kalil nanği koba na are qujaitosib soqniy.

<sup>14</sup> O ijo was, iga nuŋgo are tigeltetħgimqa niŋgi kumbra endegiy. Niŋgi na tamo uŋgasari wauqajqa asginjqonu qaji nanği tingitnjqoniy. Osib tamo uŋgasari are gulbeinjqonu qaji nanği siŋgilatnjqoniy. Tamo siŋgila saiqoji unub qaji nanği dego aqaryainjqoniy. Osib tamo kalil nanği lawo na gereinjqoniy.

<sup>15</sup> Tamo qudei nan̄gi nin̄gi kumbra uge en̄gibqa nin̄gi na kamba olo kumbra uge en̄jraib. Nin̄gi na gaigai nūngo Kristen was nan̄gi ti tamo un̄gasari kalil nan̄gi ti kumbra bole osorn̄jroqniy.

<sup>16</sup> Osib nin̄gi gaigai areboleboleingim soqniy. <sup>17</sup> Sosib gaigai pailyoqniy. <sup>18</sup> Kumbra kiye nūngoq di brantoqnim, di un̄gum, nin̄gi olo Qotei bin̄iyoqnsib min̄joqniy, “Ni keretonum.” Qotei aqa areqalo agiende. Nin̄gi Kristus Yesus beteryesosib degyoqniy.

<sup>19</sup> Qotei aqa Mondor na nin̄gi wau bei yqajqa are tigeltet̄ngimqa nin̄gi olo getentaib. Nin̄gi wau di yiy. <sup>20</sup> Qotei aqa medabu o qaji tamo nan̄gi na an̄jam mer̄ngoqniqbqa nin̄gi nan̄gi qa olo are ugeingaiq. <sup>21</sup> An̄jam kalil nin̄gi queq̄nub qaji di nin̄gi geregere tenemtoqnsib pegiyoqniy. Osib kumbra kalil dego pegiyoqnsib kumbra bole segi dauryoqniy. <sup>22</sup> Osib kumbra uge kalil uratoqniy.

<sup>23</sup> Qotei a are lawo qa utru. A na nin̄gi torei aqa segi kumbra boleq di atqas. A nūngo mondor ti nūngo qunur̄ ti nūngo jejamu ti kalil taqatesoqnimqa nin̄gi so bole gaigai sqab. Deqa mondor̄ gago Tamo Koba Yesus Kristus a olo lān̄ qureq na bamqa nin̄gi aqa ñamgalaq di une saiqoji sqab. <sup>24</sup> Qotei agi nin̄gi met̄njej qaji a na nin̄gi aqaryain̄gimqa in̄gi bole kalil di nūngoq di brantqas. Qotei a gisān̄ tamo sai. An̄jam kalil a mareqnu qaji di a bole dauryeqnu.

<sup>25</sup> O ijo was, nin̄gi iga qa Qotei pailyoqniy.

<sup>26</sup> Nin̄gi na nūngo Kristen was kalil nan̄gi segi segi kundoq̄njriy. Kumbra di agi Qotei aqa tamo un̄gasari nan̄gi yeq̄nub.

<sup>27</sup> E Tamo Koba aqa ñam na nin̄gi endegsi mer̄ngwai. Nin̄gi na Qotei aqa tamo un̄gasari kalil nan̄gi koroin̄jrsib ijo an̄jam nen̄gren̄yonum qaji endi sisiyabqa nan̄gi quqwab.

1 Tesalonaika 5:28

12

1 Tesalonaika 5:28

<sup>28</sup> Gago Tamo Koba Yesus Kristus a niŋgi qa are  
boleyeme. Bole.

Yesus Aqa Anjam Bole 2014  
The New Testament in the Anjam language of Papua New Guinea,  
2014 revision  
Nupela Testamen long tokples Anjam long Niugini, 2014  
copyright © 2014 Wycliffe Bible Translators, Inc.

Language: Anjam

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-04-28

---

PDF generated using Haiola and XeLaTeX on 27 Sep 2019 from source files dated 13 May 2019

0eb339dc-c20a-5065-9483-338933d97585